

四庫全書

子部

欽定四庫全書

六藝之一錄卷三百六十八

錢唐倪濤撰

歷朝書譜

明

王鏊

王鏊字濟之

別號守溪學者
稱震澤先生

吳縣人成化乙未進士

武宗時入內閣進戶部尚書文淵閣大學士加少傅
改武英贈太傅謚文恪文規模昌黎以及秦漢詩蕭

散清逸有王岑風格書法清勁得晉唐筆意

列紀卿

王濟之與礪菴四札行草書

式古堂書畫彙攷

震澤先生書踏莎行詞

右蹋莎行詞一闋閣老震澤先生所作而書以遺鄉之人者穆觀詞中之語可以知先生之高情雅致飄然物外而富貴不足以累之若夫詞翰之妙此真先生之餘事然亦豈他人之所能及哉

南濠文跋

王延陵

王延陵字子永鑿李子鑿還山小構其扁書未當意
延陵方髫年操管立就諸名家皆歎為不及蔭為中

書舍人

吳縣志

楊廷和

楊廷和字介夫成都人成化戊戌進士改庶吉士授
檢討正德中為吏部尚書華蓋殿大學士

列鄉紀

楊介夫長小兒札

式古堂書畫彙攷

昌運宮碑楊廷和書

李傑

李傑字世賢常熟人成化丙戌進士選庶吉士授編

修正德二年為禮部尚書贈太子太保

紀列卿

李傑字畫道逸得黃米法

蘇州志

梁儲

梁儲字叔厚順德人成化戊戌進士改庶吉士授編

修正德中為吏部尚書華蓋殿大學士贈太保謚文

肅

紀列卿

王世貞國朝名賢遺墨有梁儲書

奔州續集

楊一清

楊一清字應寧丹徒人年八歲以奇童薦入翰林為秀才成化壬辰登進士授中書舍人正德中為吏部

尚書華蓋殿大學士贈太保諡文襄

列卿紀

一清善

行草

書史會要

李遂

李遂字時器湯陰人成化壬辰進士授都水主事武

宗時為工部尚書贈太保諡恭敏

列卿紀

大慧寺碑

李璡書

洪鍾

洪鍾字宣之錢唐人成化乙未進士授刑部主事正

德己巳為刑部尚書兼左都御史謚襄惠

列卿紀

王世貞國朝名賢遺墨有洪鍾書

弇州續稿

儲瓘

儲瓘字靜夫泰州人成化二十年進士正德中為南

京吏部左侍郎謚文懿

名山藏

瓘書拙而微有筆

王世貞國

朝名賢
遺墨跋

張志淳

張志淳字進之江寧人成化甲辰進士正德中為南京戶部侍郎致仕著書自娛尤究意詩文書畫咸造

名家

列卿
紀

喬宇

喬宇字希大號白巖太原樂平人成化甲辰進士武宗時為吏部尚書為文出入六經詩多自得語通篆

隸有二李風晚精鑒賞名書古帖一見知之

列鄉紀

徐霖嘗語人有明以來喬宇篆法第一他人莫敢望

也

王鉅尊聞

篆書幾失其傳西涯翁極力振其衰而復之古白巖

先生實同斯志

柴奇蘭菴遺稿

王鴻儒

王鴻儒字懋學南陽人成化二十三年進士聰悟天成書過目成誦作字端勁有古法正德中為南京戶

部尚書謚文莊

吾學編

鴻儒書得歐顏法

列卿紀

劉春

劉春字仁仲號東川一號樗菴四川巴縣人成化丁

未進士及第授翰林編修正德中為禮部尚書贈太

子太保謚文簡為詩文力追古作晚益簡勁字畫規

模於歐而自成一家宛如冠冕佩玉有心畫焉

列卿紀

陸完

陸完字全卿長洲人成化丁未進士擢監察御史正

德中為吏部尚書

列卿紀

王世貞國朝名賢遺墨有

陸完書

弇州續集

毛澄

毛澄字憲清崑山人弘治六年進士第一人授修撰

正德十二年為禮部尚書贈少保謚文簡

吾學編

王世貞國朝名賢遺墨有毛澄書

弇州續集

毛白齋題也適軒詩帖草書

式古堂書畫彙攷

王瓚

王瓚字思獻永嘉人博學雄文下筆數十言不滯弘治丙辰進士第二授編修正德十六年為南京禮部

左侍郎贈尚書謚文定

列鄉
紀

瓚書學高閑詈光

州

續
素

王守仁

王守仁字伯安餘姚人弘治十二年進士正德中為僉都御史巡撫南贛擒宸濠封新建伯南京兵部尚

書謚文成

存學
編

新建善行書出自聖教序得右軍骨第波豎微不脫

張南安李文正法耳然清勁絕倫

紹興志

王陽明上父親二札

王文成公與弟伯顯二札

式古

堂書畫
索致

王文成手簡

王文成公素所私淑者道德耳未嘗覩其翰墨今過
沈叔敷許會施懋伯見其三紙與其王父臬大夫西
亭公相聞者法度不盡師古而道邁冲逸韻氣超然

塵表如宿世仙人生具靈氣故其韻高冥合非假學也右軍子孫在會稽書法獨不傳文成當其苗裔耶觀其骨氣雅有祖風然而功業昌厥祖多矣其所未至有以也不朽之三藝能不與焉曰游可耳

朱長春
大復乙

集

古人論右軍以書掩其人新建先生乃不然以人掩其書今觀茲墨蹟非不翩翩然鳳翥而龍蟠也使其人稍亞於書則書且傳矣而今重其人不翅於鑑稱

其書僅得於銖書之遇不遇固如此哉然而猶得號於人曰此新建王先生書也亦幸矣馬君博古君子也袁先生之書如此其多將重先生之書邪抑重先

生之人耶

徐文長集

王陽明書君子亭記

王陽明先生謫龍場用王猷張廌例為亭竹間而手書記于壁後人為摹刻之其書與辭皆工

弇州山人稟

都穆

都穆字玄敬吳縣人弘治己未進士歷禮部主客郎
中加太僕少卿七歲能詩及長泛濫羣籍奉使至秦
中搜訪金石遺文摹搨繕寫作金薤琳琅錄

吳縣志

都玄敬與存禮札行草書 南濠居士宿天王禪院

詩帖行草書

式古堂書畫彙攷

蔡羽

蔡羽字九達居吳之洞庭山因自號林屋山人工屬文
能為歌詩正行書亦道勁閒臨蘭亭十七帖人或從旁

指摘其離者曰不然吾非臨右軍吾乃教之為諸生與

文待詔齊名貢入太學授南京翰林孔目

王世貞吳中
往哲像贊

蔡書以禿筆取勁姿盡骨全

王世貞三
吳楷法跋

蔡林屋詩翰

見式古堂
書畫彙考

王守

王守字履約號涵峰吳縣人為諸生時與其弟寵俱

工藝文筆札之事而名不如弟成進士授南昌府推

官入為吏科給事中終右副都御史

王世貞吳中
往哲像贊

王守書倣李懷琳

書史會要

王寵

王寵字履仁後字履吉

別號雅宜山人

為邑諸生累試輒不

利貢入太學詩好建安三謝及盛唐文學遷固甚似之書始摹永興大令晚節稍稍出己意似拙取巧婉

麗道逸為時所趣幾奪京兆價

王世貞吳中往哲像贊

衡山之後書法當以王雅宜為第一蓋其書本於大

令兼之人品高曠故神韻超逸迥出諸人上

何良俊四友齋叢說

王履吉祝吳遜菴詩 王履吉還山詩行草書 王

雅宜題詠詩蹟 王履吉題畫諸蹟 王雅宜石湖

八絕句楷書 王履吉書枚乘七發卷 王履吉書

離騷并太史公贊卷草書 王雅宜千文楷書 王

履吉與五嶽札行草書 王履吉與子重札行草書

王雅宜嚮者札草書 雅宜山人即刻渡江帖草書

王履吉詩帖草書 王雅宜書楞伽吊古詩帖草書

王履吉書薊丘覽古并酬暉上人詩帖

式古堂書畫景致

王履吉白雀帖

王履吉先生養疴白雀寺訪故人王元肅虞山不值
作此歌元肅拏舟追及之因以二丈許桑皮縱筆滿
卷為贈雖結法小疎而天骨爛然姿態橫出有威鳳
千仞之勢蓋月餘而履吉物故當是絕筆也又二十
餘歲而元肅為雙鉤入石膏乞余言跋尾居數歲元
肅亦歿又二歲而有以此卷質者詰之知非王氏有
也無何贖去又數歲而復得之他所流落宛轉真如

傳舍失弓得弓何必在我因為題其後以俟後之君

子主斯卷者時庚午之夏伏日也

弇州山人藁

王履吉墨蹟

王履吉書元自獻之出疏拓秀媚亭亭天拔即祝之
奇崛文之和雅尚難議雁行矧餘子乎余三十許時
實諳此法久之易轍改途茫然故步殊不任年華之
感也此軸陽邱銓部胡公家藏神明煥發校別作更
覺精嫻若無論世代真可登子昂上估矣百穀向余

言履吉品清夷簡貴烏衣龍鳳儔拊今念昔願執斯

役於斯人

來禽
館集

王雅宜真蹟

雅宜先生余自少則聞之茲幸從近復兄把玩真蹟
可謂希世之珍矣本學大令乃自成家茲其所以善
也夫文亦然韓蘇諸公追的左國下乃史漢初不襲
其字句夫政亦然民田井地之遺也府兵乘田之義
也重二千石久任封建之制也莽奉周官斯陋也已

故學書而似謂之筆奴推此而百物盡可知也近復
為九岳大夫之才子文擅一時咸出心匠他日從政
我知其不羣也已因書以歸之

侯一元二谷
山人近稟

王履吉書枚乘七發卷

城南陸氏藏王履吉草書枚乘七發倣十七帖又一
好事家收文徵仲小楷古文水許傳全部法歐陽詢

未及見之

書畫
舫

陳淳

陳淳字道復後以字行別字復甫號白陽山人長洲
之大姚村人從太史衡山文公遊涵揉磨琢器業日
進凡經學古文詞章書法篆籀畫詩咸臻其妙稱入
室弟子巡撫都御史陳公知君精於篆法開館禮聘
俾書五經周禮鏤板置學名益大震

張案白陽先生墓志銘

道復正書初從文氏欲取風韻遂成媚側行書出楊

凝式林藻老筆縱橫可賞

書史會要

陳淳小篆瀟灑而勁

詹氏小辨

陳白陽詩草 白陽山人與東浦札行草書 陳復

甫月餘札行草書 陳道復梅雪詞帖行草書 陳

白陽有鵲詩帖行草書 陳道復秋來札行草書

復甫閒事札行草書

式古堂書畫彙考

陳白陽武林帖

吾蘇陳白陽先生素以文翰自命其豪暢之懷跌蕩之氣每於吟詩作字中發之詩步晉唐書則出入米蔡而時時有幻態蓋勾吳之宗匠也此卷皆武林遊

覽諸作藥括湖山勝槩而揮毫體勢儼若崖谷巔巖
煙霞吞吐亦生平適意筆也昔司馬子長遊名山大
川而文遂肆先生蓋盡攬武林之勝云

申時行賜
間堂集

陳道復少有逸氣作真行小楷極清雅晚好李懷琳
楊凝式書率意縱筆不妨豪舉而臨池家尤重其體
骨陸君持示此結構特密豈其銳意詠勝當神與景

適之際邪錢唐山水之勝為此老助一籌矣

王奉
常集

陳道復草書卷

陳道復花卉豪一世草書飛動似之獨此帖既純完
又多而不敗蓋余嘗見閩楚壯士裘馬劍戟則凜然
若熊羆及解而當繡刺之綳亦頽然若女婦可近也
非道復之書與染邪

徐文長
逸豪

陳徵君書李青蓮宮詞

陳徵君書李青蓮宮詞一卷筆氣縱橫天真爛熳如
駿馬下坂翔鸞舞空較之米家父子不知誰為後先
矣曹駕部北行攜以自隨舟過高郵得一快觀於雲

濤縹緲中政自令人有天際真人想也

莫廷韓集

王同祖

王同祖字繩武

號前峰

崑山人文太史甥為詩清麗有

唐人風善草隸二十四薦南宮明年始廷試改翰林

授編修終國子司業

弇州續藁

錢穀

錢穀字叔寶師文太史家故貧以好客故益貧室無長物太史題其楣曰懸磬因自號磬室子手錄古文

金石幾萬卷善書行法眉山篆法二李小楷法虞歐
每得其妙於法外識者以為有渴驥奔猊漏痕折釵
之勢然為畫掩世罕知者

馮元
成集

王韋

王韋字欽佩

號南原

金陵人弘治乙丑進士改庶吉士

授吏部主事擢河南提學副使以母老乞休加太僕

少卿

馮元
成集

王欽佩真草清雅有法

金陵
增事

王逢元

王逢元字子新

欽佩之子也

楷法元常草法逸少父子

詹氏

小辨

王子新英年適起遂擅海內書名或者議其真書稍

肥余謂莊重沉着脫去佻巧獨得鍾王遺法

顧璘息園存案

逢元書初學王右軍永禪師晚出入山谷老人

金陵瑣事

王韋父子俱善書人遂以大令呼子新

江寧志

徐霖

徐霖字子仁南京人篆登神品餘若真行皆入精妙
碑版書師顏柳其題榜大書則師詹孟舉並絕海內
日本使臣得者什襲為珍武宗南巡召見行宮兩幸
其宅子仁故長髯武宗手剪之以為拂子因自號髯

翁

吾學編

徐子仁九歲作大書操筆成體正書出入歐顏大書
初法朱晦翁幾亂其真後喜趙松雪筆力遒勁布構
端飭成一家書至於篆字得法於異人更造閭奧西

涯李相國白巖喬太宰時號篆聖見則以為不及

金陵

瑣事

霖好堆墨書神采爛然

書史會要

篆法久微自周伯琦後惟李文正東陽遠續其緒霖

躬詣堂室蚤尚雄麗晚益樸古殆登神品

松江志寓賢傳

徐子仁手蹟

徐生平所得近代名蹟如仲溫希哲徵仲履吉輩至多獨於徐髯仙子仁頗愛之而不能多得以為恨久

栖靖室於一切豪翰付之烏有矣而新都汪仲嘉忽
以此卷見示皆書青蓮居士作為蜀道難梁父吟天
馬陽春二歌前有尊酒行凡五章書正草得二體其
體乃有古隸筆似歐陽蘭臺草書半得章法而實步
趨會稽其精雅妍媚使人嘖嘖生賞惜腕力少弱以
登蘭臺堂則有餘叩會稽室或不足漫題其後付兒

輩藏之以備一種

弇州續稿

徐子仁三體十字卷

題跋已見

葛許

葛許字希淵號秋泉四明人僑居南昌能篆書時徐霖在金陵徑往訪之語以誤從偏傍者數事霖敬服

遂相友善

書史會要

李夢陽

李夢陽字獻吉

號空同

系出開封籍慶陽弘治六年進

士授戶部主事擢郎中武宗時謫布政司經歷起江西提學副使為古文詞與何景明徐禎卿邊貢顧璘

鄭善夫陳沂朱應登康海王九思號十才子

吾學編

王世貞云嘗見李先生寫七碑大有顏平原筆

王世貞國

朝名賢遺墨跋

李獻吉春日東莊帖草書

式古堂書畫彙考

何景明

何景明字仲默

號大復山人

信陽人年十九舉進士授中

書舍人武宗時為陝西提學副使

吾學編

景明書倣李長沙而指小滯

王世貞國朝名賢遺墨跋

徐禎卿

徐禎卿字昌穀蘇州人仕至國子博士幼精文理不由教迪長宿驚歎稱為文雄專門詩學成一家之言

國寶
新編

禎卿詩甲海內而書極少行筆道雅在文蔡間

弇州山人

素

徐昌穀與惟脩札楷書 徐昌穀與仁渠札行書

式古

堂書畫

宗致

顧璘

顧璘字華玉號東橋上元人舉進士方弱冠敏瞻嗜學多交名侶嘉靖中為刑部尚書詩篇清麗文辭雅

質多傳於世

吾學編

東橋真草皆清徹可愛

金陵瑣事

華玉書翩翩有晉人意

弇州山人彙

璘善行草筆力高古

書史會

顧璘

顧璵字英玉華玉之從父弟也正德甲戌進士授南京工部主事歷官河南副使罷歸橐蕭然無以給昕夕臨街一小樓扁曰寒松訓蒙數人以自給

上元縣志

英玉真草皆有晉人風味

金陵瑣事

鄭善夫

鄭善夫字繼之閩縣人初為戶部主事劉瑾用事告

歸築少谷草堂巖居六載起為禮部員外郎復告歸

嘉靖改元薦起吏部郎中

閩書

善夫署書做晦翁而自得

書畫
舫

善夫書法入神真行斟酌聖教狂草奔放縱橫爛熳

顛素而下弗論也

書史
會要

陳沂

陳沂初字宗魯後字魯南鄞人正德十二年進士改

庶吉士除編修嘉靖中以行太僕卿致仕少好蘇氏

學自號小坡與顧璘王韋稱金陵三俊

吾學
編

沂書學蘇長公旁及篆隸繪事皆稱能品

金陵
瑣事

孫一元

孫一元字太初不知何許人自稱曰關中人好老氏書辭家入太白山因號太白山人工為詩與名流倡

和劉麟清
惠公集

太初性喜學書

書史
會要

景暘

景暘字伯時金陵人正德戊辰舉進士第二人授編修仕至左中允南京國子司業工行書尤善小篆與

周伯琦埒為文以意勝詩蕭散有致

金陵志

胡纘宗

胡纘宗字孝思一字世甫泰安人正德戊辰進士授

簡討歷官右副都御史

列卿紀

纘宗書法筆力清勁古雅唯乏風韻耳

書史會要

楊慎

楊慎字用修新都人正德辛未舉會試第二廷試第一授翰林修撰兩上議大禮疏謫戍雲南嘗醉胡粉

傅面作雙丫髻插花諸伎擁之游行城市諸酋以精
白綾作襖遺諸伎服之酒間乞書醉墨淋漓諸酋輒

購歸裝潢成卷

蜀志

慎以博學名世書亦自負吳興堂廡

王世貞國朝名賢遺墨跋

楊用修太史詞草

楊升庵禹碑歌卷

楊用修石

馬泉亭詩帖行書

楊升庵客途崇聖寺二詩帖行

草書

式古堂書畫彙攷

孫承恩

孫承恩字貞甫號毅齋松江人正德辛未登進士考
庶吉士授編修以禮部尚書致仕贈太子太保謚文
簡書法遒勁無纖媚態叅之古意尤多

環溪集

孫紹祖

孫紹祖字遠宗號我山廣德人正德辛未進士官至

中允工書法為時所尚

書史會要

常倫

常倫字明卿澤州沁水人正德辛未進士仕大理評

事以詩名書瀟灑道勁直與晉爭上下

書史會要

張潮

張潮字惟信號亭溪更號玉溪內江人正德辛未進士改庶吉士授編修終禮部尚書能詩文尤工楷書

分省人物攷

張玉谿方塘翁帖行書

式古堂書畫彙攷

汪必東

汪必東字希澮崇陽人正德辛未進士邃於經史能

為古文詞善草書累官河南叅政

湖廣總志

胡松

胡松字茂卿號承菴績溪人正德甲戌進士官至工

部尚書行草流俊有法

弇州山人彙

顧可久

顧可久字與新別號洞陽無錫人正德甲戌進士拜

行人左遷國子學正嘉靖初拜戶部員外郎終廣東

按察副使好染翰作鍾王書盡得其髓

皇甫汈司勲集

顧與新度辰海謠二詩帖 顧與新謁張公祠詩帖

式古堂書
畫彙攷

林達

林達字志道號愧吾正德甲戌進士歷官南京吏部

考功郎中工篆隸能詩文

何維騏續
莆陽文獻

王廷陳

王廷陳字稚欽黃岡人正德丁丑進士選庶吉士解

館拜吏科給事中出為裕州知州

呂元音黃岡縣志

稚欽書法故不必成就而翩翩自賞宛有徵仲中年

以前筆

弇州續索

虞守隨

虞守隨字惟貞正德甲戌進士特授四川御史謫州

判善真行草書

義烏縣志

林黼

林黼字質夫號石峰閩縣人通篆籀登正德丁丑進

士授大理評事

分省人物考

成周

成周無錫人正德二年進士官僉事善歌詩工書豐

腴流宕得眉山法

無錫志

王謳

王謳字舜夫西安人正德丁丑進士授工部主事陞

僉事有才力學賦詩追逐古人善楷行書似顏柳

陝西

通志

王鳳靈

王鳳靈字應時順德之耕原人正德丁丑進士仕淮南太守終陝西提學字法右軍人珍慕之淮生稱曰

筆峰先生

書史會要

孫存

孫存字性甫滁人正德進士仕至河南左轄書法以

清媚見稱

書史會要

于鏊

于鏊字器之號雲心滁州人正德戊辰進士授戶部

主事終貴州按察使究心六書之學年八十燭下猶

能作蠅頭楷書

分省人物考

張孚一

張孚一號雲川弼之孫正德丁卯領鄉薦知建陽縣

喜作小楷或署書咸工

莫如忠崇蘭館集

金琮 金魚

金琮字元玉金陵人嘗游浙之赤松山愛其佳徘徊不能去因自號赤松山農善書初法趙子昂晚年學

張伯雨精工可愛文待詔極喜之得片紙皆裝潢成

卷題曰積玉

靜志居詩話

元玉家有極高明樓每夜學書然燭一枝月然三十

枝寒暑無間

金陵瑣事

子魚字慕楨書得家學筆力稍

軟

金陵瑣事

金元玉手蹟

王可大比部亟為予言金元玉書法勝徐子仁問之
吳中人不識也亡何購得此卷元玉筆撫放吳興老

意縱橫神爽奕奕可愛惜結字小未去俗耳視子仁
堆墨不啻誠過之

弁州山人素

謝承舉

謝承舉字子象初名濬字文卿儲柴墟在南考功引
與同社累十舉不第退耕國門之南自號野全子

息園

存素

謝髯九子象出於蘇黃兩家筆力清硬

金陵瑣事

顧元慶

顧元慶字大有長洲人以圖書自娛閒游戲翰墨瀟灑夷曠得作者遺意故居埭川後徙通安里規大石

塢為壽藏因自號大石山人

瞿文懿公集

顧元慶好古法書嘗作瘞鶴銘考云其師南濠先生家藏碑刻甲於東南錄其文悉皆品題為金薤琳琅凡數十卷獨恨此銘為山僧所匿乃放舟京口冒雪渡江始得於山石之下親搨以歸由是復傳人間

書史

會要

李祐

李祐字宗吉別號三川安定人善大書草書

何大復集

周梁石

周梁石撫州太守書效朱文公體甚奇偉

楊廉文恪公集

陶楷

陶楷字文式號菊亭秀水人平生購奇書蓄名畫甚

富吟詩作文思致雋永真草書得古人筆意

楊廉文恪公集

瞿汝臣

瞿汝臣號古村

瞿景淳父

贈翰林編修字類沈度

瞿文懿公集

張鉞

張鉞字寶之苦愛歐陽真帖暇則臨之敝筆積者種

種故學多可觀

朱躍玉洲集

朱正

朱正字守中長洲人正德初以名醫徵字書秀潤知

者珍愛之

懷星堂集

陸平

陸平字以和別號竹坡

陸深父

松江上海人善筆札真

行草書皆有晉唐人風致

嚴山文集

司馬伯通

司馬伯通弘正間傑材也草書倣聖母帖仕業亦豪

俊其詩多清豁

徐文長集

李穆

李穆字元載吉之泰和人官南樂訓導罷閒後踪跡多在荆楚間因以寄寄為號所作真行篆隸諸書學

者爭藏弃以為法

羅欽順整
卷存景

詹貴

詹貴字存中休寧人行書似蘇子瞻草酷似子由其

法趙承旨亦宛然似之

詹氏
小辨

沈仕

沈仕字子登自號青門山人岳岱曰翰墨丹青游藝

王道思序其詩云顧東橋以為江湖詩人第一流

清河

書畫

舫

張詩

張詩字子言北平人自號崑崙山人學文於何景明
與諸豪俊交游倡和重於都下為文雄奇變怪覽者
不敢以今人待之字書放勁得其一幅揭之壁間可

以驚人亦足驅鬼

吾學編

高澂

高澂字宗呂侯官人早歲善屬詞不樂舉子業孤潔

一世知名海內善隸草八分

閑書

楊黼

楊黼雲南太和人素好學工書善篆籀庭前有大桂
縛板樹上題曰桂樓偃仰其中躬耕數畝以供甘旨
註疏孝經數萬餘言皆小古篆作字片硯硯乾欲下
桂樓取水硯池中忽已盈矣自是為常人謂孝感

雲南

通志

華愛

華愛字仁卿號石牕標陽人正德時官桂林守精於

書法尤工義獻行草評者謂其遒勁美澤變化若風

雲翱翔若龍鳳

書史會要

李贊

李贊字惟誠號平軒蕪湖人正德時官浙江左轄草

書遒勁得蘇長公筆意

書史會要

鄭天鵬

鄭天鵬諸暨人正德中舉於鄉書法為世所珍今戈

陽手書文告每為好事者竊去

書史會要

江巨石

江巨石正德時為禮部主事好為鍾鼎大篆斯邕以

下耻而不為

書史
會要

鄭雍言

鄭雍言四明人舉進士官中書舍人工行草小楷篆

書

書史
會要

朱端

朱端字克正海鹽人正德間以畫士直仁智殿亦善

書史
會要

宋顯章

宋顯章字文光號藻汀濮人以孝行著正德時人稱

宋孝子作字用草竹筆體畫遒勁自成一家

書史
會要

宋顯章工草書善臨古帖

王汝訓東
昌府志

楊應奎

楊應奎字文煥益都人正德間進士授仁和尹陞兵

部主事轉禮部員外郎博覽羣籍工右軍書法

馮惟
訥青

州府志

曾嶼

曾嶼號少岷四川瀘州人舉進士正德十二年為建

昌知府博通羣籍善書法工古文詞

郇鳴雷建昌府志

涂徵

涂徵字惟濤新城人正德中歲貢習鍾王書法選入

內庭寫誥授徽州府同知遷刑部郎中

郇鳴雷建昌府志

張允中

張允中字道宗忻州人正德乙卯舉人知大興縣醞

藉有文書法適勁

黨承志忻州志

劉樞孫

劉樞孫字復孺文待詔以兄之子妻之字學蘇眉山

尤工秦漢篆名擅一時

吳縣志

朱治登

胡師閔

朱治登胡師閔並師文待詔書法待詔遺蹟世所珍

藏大半二人之筆

王樞登筆記

朱貞孚

朱貞孚與文徵明同時為景寧教諭書畫兼美

吾學編

彭昉

彭昉字寅之初有盛名選擇為吏南粵舉止多輕躁不能其官罷歸初年少游於文徵仲之門名日以著所為詩若文一時靡焉向風爭相愛慕書跡遒勁貴

於時

續文獻通考

王朝佐

王朝佐字邦翰晉江人能詩善書畫文徵明見而賞
歎曰此人生在泉州可謂黃金與土同價

閩書

嚴賓

嚴賓字子寅一字鶴邱金陵人字法米帖能詩及畫
所蓄古法書名畫頗多往來東橋衡山諸公之門

江寧

府志

楊珂

楊珂字汝鳴餘姚諸生從王文成學隱居秘圖山養

母以孝聞為詩瀟灑不羣書得晉人筆法

紹興志

楊珂初亦習二王後益放逸柔筆踈行了無風骨所

謂南路體也

書史會要

王洪

王洪字宗範海鹽人容貌脩偉能書攻詩善談吐游

陽明先生門

海鹽圖經

張含

張含字愈光保山人少舉於鄉不樂仕進游梁宋門

為李夢陽所知與楊慎友善學者稱禺山先生

雲南通志

張禺山晚年好縱筆作草書不師法帖殊自珍異

皇明

新語

林鉞

林鉞字宏用晉江人官南戶部郎中出守太平與關

西呂柟相友善善詩能書

閩書

董宜陽

董宜陽字子元號紫岡復號七休居士上海人屢試

不第遂棄舉子業專攻詩古文詞楷書法虞永興行
草法僧智永顧司寇璘文待詔徵明許奉常穀皆推

獎之

松江志

崔深

崔深字靜伯吳江人正德中以字學薦授中書舍人

萬姓統譜

杜君澤

杜君澤號小癡姑蘇人善楷書嗜酒流寓高郵

圖繪寶鑑

續纂

李杲

李杲字光遠號柯耕西安人工楷書授禮部司務史書

會要

陳世英

陳世英上虞人通尚書史記善楷法

震澤集

蔣能

蔣能號竹坡道人長洲人精小楷古篆由歲貢官福

建鹽運使司經歷改長蘆俱有政績

陸金蔣
翁墓碣

林焯

林焯字惟大閩縣人工書遒丈逾佳

福州
志

林焯署書學松雪而少勁

閩書

張煒

張煒字德南閩縣人官刑部郎中善詩工書書得法

於朱晦翁而參以己意其所題識至逾尋丈莫不極

天然之趣

閩書

吳楚

吳楚休寧人善草書製墨得李廷珪遺法文待詔嘗

記其墨法為神品

徽州府志

王時任

王時任字澤民華州人好酒工書

王維楨存笥藁

黃源

黃源清流人由舉人為汝寧教授能文善書多有述

作

汀州志

邱山

邱山字安重莆田人知瑞安縣擢監察御史終雲南按察副使雅妙書法刻石崖州大忠祠一時重之

閩書

林渠

林渠莆田人宿州同知工書

閩書

羅黻

羅黻水德司人好吟詩工書大字至二尺楷法可觀

田秋思
南府志

朱唐

朱唐姑蘇人善小楷流寓汴梁凡碑銘皆唐書之

李天

麟祥符
縣志

柴世需

柴世需字元功陽穀人以詞賦名尤善真草隸書選

入中祕纂脩國史遷工部員外郎

黃承玄安
平鎮志

徐潮

徐潮字以同居洞庭西山好學不倦詩章字畫迥出

流輩

吳縣志

馮濟

馮濟字子舟能詩善書

吳縣志

錢潤

錢潤字惟霖性高曠喜近林藪與善詩者為吟社詩

溫麗可誦書法宋仲溫

常熟志

嚴雍

嚴雍常熟人有隱節工篆隸

常熟志

嚴芸

嚴芸字允芳雍子善大書篆隸有家法

常熟志

張奉

張奉字伯承張丑跋文徵明少峰圖云右文太史贈

大父少峰圖一方其後大父撰述二篇宗老伯承用

古隸書之各得漢魏唐人遺風

清河書
畫舫

六藝之一錄卷三百六十八

欽定四庫全書

六藝之一錄卷三百六十九

錢唐倪濤撰

歷朝書譜

明

李時

李時字宗易任邱人弘治壬戌進士改庶吉士嘉靖

三年進侍讀學士陞禮部侍郎歷少傅兼太子太師

吏部尚書華蓋殿大學士贈太傅謚文康

列卿紀

資福寺碑嘉靖初山西按察使司僉事錢俊民撰書

之者禮部左侍郎任邱李時也

日下舊聞

夏言

夏言字公謹貴溪人少警敏能屬文尤長筆札正德丁丑舉進士嘉靖十五年為吏部尚書華蓋殿大學

士隆慶初賜諡文愍

列傳
紀

文愍以才雋居首揆天下重其書貞珉法錦視若拱璧正行亦道美但肥過而滯老過而稚耳榜署書尤

可觀

賁溪縣志

夏桂洲五言絕句帖行書

式古堂書畫彙考

顧鼎臣

顧鼎臣字九和崑山人弘治乙丑舉進士第一授修撰嘉靖中為禮部尚書武英殿大學士贈太保謚文

康

列卿紀

王世貞國朝名賢遺墨有顧鼎臣書

弇州續彙

許纘

許纘字廷美河南靈寶人弘治丙辰進士嘉靖中為吏部尚書文淵閣大學士加少傅平生寡慾於古稀之年猶作細楷政暇閱經史典籍老而不倦贈少師

謚文簡

列卿紀

張治

張治字文邦茶陵州人七歲揮墨成巨字稍長諸史百氏靡不綜貫正德庚辰舉進士第一入翰林為庶吉士嘉靖二十八年以禮部尚書兼文淵閣大學士

贈少保謚文隱

列卿紀

徐階

徐階字子升華亭人嘉靖初及第第三人授翰林編修累遷吏部尚書建極殿大學士贈太師謚文貞

華亭

縣志

公名臣不擬以詞翰名然亦自穩密

王世貞國朝名臣遺墨跋

徐文貞與白谷詩帖 徐太師五嶽詩帖俱行草書

式古堂書畫攷

嚴訥

嚴訥字敏卿常熟人嘉靖二十年進士授編修四十四年以吏部尚書兼武英殿大學士贈少保謚文靖

工文善書

弇州續集

文靖好習鍾王書

陳璘濟美堂集

嚴文靖臨趙文敏四十二章經

少保嚴文靖公故精八法第於魏國趙文敏公書不甚規規效顰今觀所摹文敏佛說四十二章經墨妙

譬之周昉貌趙郎殆得其神彩情性固公臨池之力
深要於此經有神解冥契者固不覺其轉蜺中鵠之
妙至此也公雖不名佛其操行制念與此經亦悲慈
平實鮮不合者眉山氏謂范蜀公為學佛作家而自
說臨成都講堂帖為得右軍三昧則文靖公哉經云
以此深心奉塵刹是則名為大報恩公之子有焉

州弁

續素

嚴澍

嚴澍字道時文靖公第三子長於書偶得虞永興米

南宮直蹟臨池竟日忘倦往往得兩家之妙邑之慧

日寺殿榜道時筆也筆勢飛動識者賞其逸韻

瞿汝稷同

卿集

嚴澤

嚴澤字道溥文靖公子仕中書舍人神宗見澤書稱

善人多寶之

常熟志

嚴濟

嚴濟字道行文靖公子善書得曹娥碑筆意

常熟志

嚴濟書學鍾元常而多姿態好寫佛經乞者如市

李維

禎大泌
山房集

秦金

秦金字國聲無錫人弘治癸丑進士嘉靖二年為戶

部尚書贈少保謚端敏

列卿紀

崇壽寺碑秦金書

羅欽順

羅欽順字允昇秦和人弘治癸丑進士授編修嘉靖

六年為吏部尚書贈太子太保謚文莊

列卿紀

王世貞國朝名賢遺墨有羅文莊公欽順書

弇州續稿

顧清

顧清華亭人弘治癸丑進士嘉靖中為南京禮部尚

書謚文僖

列卿紀

顧文僖公書與羅文莊公筆俱清勁

弇州續稿

朱希周

朱希周字懋忠其先崑山人徙居吳初釋褐為翰林

修撰累遷南京吏部尚書贈太子少保謚恭靖

王世貞吳

中往哲
像贊

公生平不作一行草筆書極謹細

王世貞國朝
名賢遺墨跋

劉麟

劉麟字元瑞號南坦饒州人家金陵弘治丙辰進士

嘉靖七年為工部尚書致仕好樓居力不能營索文

徵明繪神樓圖字之曰高明所集古詩十六題以自

況書法宗羲獻尺牘片簡人爭寶之

李默劉南
坦小傳

劉司空書醇古簡足可砭今人好奇作異之病

墨林快事

周倫

周倫字伯明號貞菴崑山人弘治己未進士官至南京刑部尚書贈太子少保諡康僖善大書有眉山豫

章風骨

王世貞吳中往哲像贊

康僖公性嗜書善行草今刑部壁有其書識者謂似

山谷

崑山人物傳

周貞菴同年燕集詩帖行楷書

式古堂書

畫彙

考

周用

周用字行之號白川吳江人弘治壬戌進士拜行人

司行人孝宗時為吏部尚書贈太子太保謚恭肅

世經

堂集

公喜為詩動盈卷帙書法俊逸

靜志居詩話

劉節

劉節字介夫世稱梅岡先生大庾人弘治乙丑進士

嘉靖十一年為刑部右侍郎

列卿紀

劉節書傲顏魯

公書史

會要

湛若水

湛若水字元明初名露字民澤避祖諱改今名居廣之增城甘泉都學者稱甘泉先生從游陳白沙以斯文屬之弘治乙丑進士選庶吉士授編修嘉靖中為

兵部尚書

洪垣甘泉先生墓誌銘

若水倣陳白沙天然不及也惟署筆差有骨

書史會要

魏校

魏校字子才號莊渠崑山人弘治乙丑進士世廟初以太常少卿監國子祭酒謚恭簡著六書精蘊

分省人物

考

太常卿莊渠魏公嘗著六書精蘊因古文以正小篆之偽又參大篆及擇小篆之可者以補古文之闕

陸瑋

贊齋文集

顧應祥

顧應祥初名夢麟字惟賢長洲人家吳興舉進士授

饒州府推官累遷南京刑部尚書贈太子少保詩似

白少傅書似趙吳興

弇州山人稟

陸深

陸深字子淵號儼山華亭人弘治乙丑舉進士改庶

吉士授編修嘉靖中為詹事致仕贈禮部侍郎謚文

裕書法妙逼鍾王比於趙松雪而遒勁過之

夏言桂洲文集

唐錦儼山陸公行狀云國初吾松多以書學名天下

久已絕響公近奮起遂凌躐前人而處其上張雷以

書學際遇實出公所指授識者謂公趙文敏後一人

非諛詞也

龍江集

陸文裕自言吾與吳興同師北海海內人以吾為取法於趙是意不安於趙也究論其風力實出吳興之

上

莫廷韓集

陸宮詹以書名家雖率爾作應酬字俱不苟且曰即

此便是學字何得放過

董其昌畫
碑室隨筆

陸深真草行書如鐵畫銀鈎遒勁有法顏顏北海而

伯仲子昂一代之名筆

雲間志略

陸子淵白鴈詩卷行書 陸文裕夜宴詩帖草書

陸儼山望夫石樂府帖行書 陸子淵書南山野倡

記 陸文裕藏書目序楷書 陸儼山弔劉生賦楷

書 式古堂書畫彙攷

陸儼山書

陸文裕公儼山先生書法雅宗趙松雪晚谿李北海
西晉風格宛然具存足傳不朽人言先生平居雖尺

簡裁答必精鉛槧必工結構即於所甚暱者造次應
之不廢也其用力益勤如是今觀東濱朱君所藏諸
帖信哉而秦君鴻臚後沙東濱壻也寔彙緝成卷以
備珍賞則公雖往而神標輝映已在二君冰玉間矣

崇蘭
館集

陸子淵白鴈詩卷

文裕公嘗云我與松雪翁同參李北海其自負如此
然實從吾鄉沈學士得來故梁叔寶之與先世墨蹟

并藏不作野鷺視也若白鴈諸詩氣骨高邁變化感
愴直可平抗海叟矣陳繼儒題

邵銳

邵銳仁和人正德戊辰進士改庶吉士授編修嘉靖

十一年為太僕寺卿謚康僖

列卿紀

王世貞國朝名賢遺墨有邵銳書

弇州續集

周金

周金字子庚號約菴武進人徙南京正德戊辰進士

擢給事中嘉靖時為南京戶部尚書善字書有晉人

風骨贈太保謚襄敏

唐順之荊川文集

許成名

許成名字思仁聊城人正德辛未進士選庶吉士授

編修嘉靖初為禮部左侍郎書初學逸少已沉酣吳

興小變之遒逸飛動甚為海內鑒賞

分省人物考

成名作真行筆頗簡勁然結構踈而醜

書史會要

韓玉

韓玉字廷瑞通許人舉於鄉拜郟城知縣棄官歸稱
寄傲子嗜古詩奇字嘉靖二年七十歲矣尚作蠅頭
楷字即片字未見一畫苟也

李夢陽
空同集

徐江山

徐江山字六橋錢唐人正德辛未進士官尚寶卿工
真草法世宗愛其書御製詩文必命江山書之

杭州府志

許宗魯

許宗魯字伯誠咸寧人正德丁丑進士選庶吉士嘉

靖中為右僉都御史終太常少卿以善書名海內

王庭

咸寧縣志

宗魯書有聖教遺意

書史會要

徐獻忠

徐獻忠字伯臣號長谷華亭人嘉靖乙酉舉於鄉知

奉化縣謝政歸葺舊廬治梅圃讀書其中真草書法

蘇趙

松江志

伯臣本非當家用筆圍圍而時吐鍾意

王世貞三吳楷法跋

徐伯臣與子元札

徐長谷五言律詩帖行楷書

式古

堂書畫

彙攷

張文憲

張文憲字廷鑑父山人流寓桐鄉七歲工八法孝宗

召試乾坤二大字稱旨令讀書翰林院嘉靖癸未舉

進士終工部尚書

桐鄉志

豐坊

豐坊字人叔號南禺外史鄞人為人逸出法紀外而

書學極博五體並能諸家自魏晉以及國朝靡不兼
通規矩盡從手出益工於執筆者也以故其書大有
腕力特神韻稍不足

詹氏
小辨

列朝詩集云字存禮改

名道生字人翁嘉靖二年進士除禮部主事

豐考功晚痺而跌株連臂於書不無少妨

徐文
長集

坊家藏古碑刻甚富臨摹亂真為人撰定法書以真

易贗不可窮詰

鄧縣
志

坊草書自晉唐而來無今人一筆態度惟喜用枯筆

乏風韻耳

書史會要

豐道生臨續書譜并識帖行楷書 豐南禺臨養生

論并題行草書 豐西農詠史并登瑞石山詩帖行

書

式古堂書畫彙考

豐人翁書卷

昔王逸少人品為書法所掩天下知其書不能盡知其
人豐人翁實有筆人望不副天下惡其人并廢其
書非也今觀諸帖雖多老年顏筆然時出入二王兼

存米顛風致玉山程孟孺最善鍾顏二家書故特寶
存此老遺筆亦宋人不廢京卞書意

王奉
常集

豐吏部論書真蹟

本朝知書者推豐吏部而吳人往往短之四明李生
子初出此帖相示楷篆八分行凡四體大都論書法
及舉魏晉人名墨而未終者然其議論刻核非精其
技者不能也余筆札最拙亦願以暇日臨摹古人而
未及安能窺豐先生藩籬哉姑跋數語以塞子初之

請

馮夢禎快

雪堂集

徐蘭

徐蘭字芳遠號南塘其先餘姚人後徙鄞為郡諸生
累舉不第遂潛心書法正書師鍾繇宣示帖行草師
王獻之授衣天寶節過鵞還等帖皆淳古遒勁度越
流俗尤精六書考究點畫正其訛謬作古文奇字得
邊魯生筆法八分初法蔡邕淳于長碑不失矩度而
晚年參以己意時人謂其書與程南雲並馳遠近求

者無虛日蘭亦高自矜負間有挾勢位使輿隸致之
輒白眼叱去曰吾豈祇役者耶人以是益重之

張時徹寧

波志

徐蘭與豐坊同時好作隸字不師漢人而師宋廬陵
朱協極蘇學嘗有協極所書敬齋箴石刻字畫無法
俗惡可厭後之人乃有好之如徐氏者亦其所遭然

也

金薤
琳瑯

蘇若川

蘇若川字君楫休寧人受筆法於文待詔及南禺外史其書得外史為多徑寸草書臨二王清灑可愛

唐氏

小辨

馮世雍

馮世雍字和一字三石江夏人嘉靖癸未進士博學工書及詩古文辭由吏部郎中出為杭州知府調徽

州

湖廣通志

王慎中

王慎中字道思號南江更號遵巖

晉江人

嘉靖丙戌進

士授戶部主事為古文詞與唐順之陳東輩號八才

子仕至河南參政

閩書

慎中行草亦遒逸而不諳八法未脫塵氣

書史會要

馬呈道

馬呈道號南江嘉靖二年貢士四體俱工極有書學

金陵

瑣事

楊儀

楊儀字夢羽常熟人嘉靖五年進士授工部主事以
山東按察副使移疾歸購萬卷樓多聚宋元舊本名
人墨蹟鼎彝古器之屬江左推為博雅

常熟志

王世貞國朝名賢遺墨有楊儀書

弇州續稿

袁袞

袁袞字尚之吳縣人晚耕謝湖之上因以自號博學

善屬文尤長於詩書法入米元章之室

蘇州志

袁袞

袁袞字永之號胥臺聚弟舉進士選庶吉士左官刑部主事改兵部論戍湖州袞工文章精筆札而湖當山水間諷誦著述傳遠近雖在戍而名益重起南武部主事遷廣西提學僉事

楊循吉吳中往哲記

永之詩名噪一時無能舉其書者而書却有風態可

賞

弇州續稿

袁尊尼

袁尊尼字魯望袞子文待詔引為忘年交性善書書

亦在能品嘉靖乙丑成進士授刑部主事至山東提

學副使

吳縣志

顧聞

顧聞字行之吳縣人舉嘉靖戊子鄉試上公車輒不

利寄傲詩歌號九峻山人

蘇州志

聞才華偉麗鋪序豐長至於染翰人並稱美

岳岱今雨瑤華

羅洪先

羅洪先字達夫吉水人嘉靖八年進士廷試第一人

授修撰進左春坊贊善罷黜家居閉關習學求端性

命有時能前知事贈光祿少卿謚文恭

吉水縣志

洪先書頗秀潤出聖母帖而豐肉少骨穠媚有之蒼

老不足

書史會要

唐順之

唐順之字應德一字義修武義人嘉靖己丑會試第

一人授兵部武選主事改翰林院編修用胡宗憲薦

超拜僉都御史巡撫淮揚謚襄文

武義縣志

順之書王明齋卷云明齋以古文書六十四卦名遺
余而索余為之草書舊詩於冊用以相報草書出東
漢芝象以後昌黎氏鄙之以為俗書逞姿媚者也君
惠我以科斗頡氏太古之書而余乃報之以效近俗
姿媚之書其不相稱甚矣

荆川
文集

王電

王電字明齋崑山人博學勵行嘗取古文諸書正小

篆之謬名曰同文備考

羅念
菴集

王明齋精史頡氏之學嘗以古文書六十四卦名以

還科斗之舊

荆川文集

沈愷

沈愷字舜臣別號鳳峰華亭人嘉靖己丑進士授刑

部主事穆宗時以太僕少卿致仕書倣張顛有龍蛇

飛動之勢

松江志

吳子孝

吳子孝字純叔別號海峰晚更號龍峰長洲人嘉靖

己丑進士選為翰林庶吉士出為湖廣右參議字學

虞歐稍變戈法

皇甫汈
司勳集

王問

王問字子裕學者稱為仲山先生常之無錫人嘉靖壬辰進士授戶部主事歷車駕郎中擢廣東按察僉事行至桐江徘徊不欲去賦詩十二章投劾而歸築亭於湖濱寶界山焚香讀易興至則為詩文或行草書數紙用自娛說人稱其書類米芾又類黃涪翁

王錫

爵文肅
公集

問有高名作行草及署書無所師承而風骨遒勁渴
筆縱體往往與醉翁亭記法同

書史
會要

王子裕墨刻

賦中有蘇長公前後赤壁余嘗謂如文中之有漆園
書中之有飛白畫中之有董巨要不可用湘纍蜀贊
据樵詰曲例之今王子裕先生乃能縱筆以飛白寫
其辭道逸勁迅神采飛動真可謂兩合矣余家藏陳

道復書後赤壁賦其堅偉庶幾並駕然飛而不白終

當讓先生一頭地也

弇州續集

王先生登武樓清暉樓歌起韻兩韻全是青蓮家法
中頗出入唐人然雄逸爽勁誦之如食袁家梨快不
可言若行草則多渴筆神采飛動令人思顛旭醉素
先生之子女明捐石齋中以寓羨塙之恩僕謂曷不
龕之樓壁與西湖對當雨高雲起雷電轟掣時方知
此歌與此書之妙

同上

王子裕先生手書玉芝翁歌其八法絕得坡仙三昧
若吳原博先生為之風骨雖有餘神觀似不足品故
當在先生下也詩歌婉潤飄逸真之坡集中惟煙江
疊嶂贈畫御容師二歌可具賓主餘俱避舍嗚呼先
生往矣所謂仙而謫者非邪

全上

陳嶢

陳嶢字山甫別號宅平又稱紫微居士嘉靖壬辰進
士官至湖廣右叅政詩文爾雅書法亦精嘗為人跋

智永千文後江陵聞而欲得之或持贖帖求跋塏曰
昔人謂孔先不識進退字張禹不識剛正字許敬宗
不識忠孝字柳宗元不識節義字今江陵兼之寧識
我字邪竟不為跋

陳有年忠介公集

方元煥

方元煥字晦叔山東人嘉靖甲午鄉貢作行草自矜

以為雄偉有力而踈野粗放署書稍勝

山東通志

潘德元

潘德元字鄰玉崑山人領嘉靖甲午鄉薦仕至應天府治中能詩兼工書翰為歸太僕所稱

崑山志

吳山

吳山高安人嘉靖十四年及第第三人末年為禮部

尚書

吾學編

祐聖觀碑吳山書

張瀚

張瀚字子文別號元洲仁和人嘉靖乙未進士官至

吏部尚書謚恭懿書法大令智求最喜為人書

馮夢禎快

雪堂集

陳鳳

陳鳳字羽伯金陵人嘉靖乙未進士官至陝西參議

與許仲貽齊名

靜志居詩話

陳羽伯行書筆筆晉人

金陵瑣事

許穀

許穀字仲貽上元人嘉靖乙未會試第一人官至南

京尚寶司卿

上元志

仲貽工行書

金陵瑣事

莫如忠

莫如忠字子良號中江華亭人嘉靖戊戌進士授南
繕部主事累官浙江布政書法以二王為宗尤工草

書勢若龍蟠虎卧

松江志

如忠行草風骨朗朗亦善署書

書史會要

董其昌云吾鄉莫中江方伯書學右軍自謂得之聖
教序然與聖教序體小異其沉著逼古處當代名公
未能或之先也予每詢其所由公謙遜不肯應及見
王右軍官奴帖真蹟儼然莫公書始知公深于二王

畫碑室
隨筆

中江書法自右軍大令而下不廢夫李處

州趙承旨殘行斷楮人莫不奪之蝨魚之口而襲之

篋笥之腹

唐文獻占
星堂集

莫中江崇蘭館帖

今天下墨池一派推重三吳而吾鄉獨以工書遇主
前有二沈後有二張沈公度至學士粲起翰林至大
理少卿張公天駿至大宗伯電至少宗伯其後如張
南安東海以草書勝得顛素筆陸學士儼山以行楷

勝得李括州趙吳興筆自莫方伯父子出聲實烜赫
掩其上今展玩崇蘭館帖神明煥然名不虛得真莫
氏之山陰羲獻也吾鄉書家如任子明仁發王伯靜
默朱孟辨芾陳文東璧衛立中德辰章共辰弼曾心
傳遇顧謹中祿皆名載書史而以子孫彫零無從簡
括其一點一畫若後有賢者如君全兄弟豈至泯滅
不傳哉故吾表而出之庶幾托莫氏以不朽云

書畫考

莫雲卿

莫雲卿初名是龍後以字行改字廷韓別號後朋又號秋水方伯子良之子也補郡博士弟子攻詩古文書法無所不窺而獨宗羲獻宗米楷宗鍾繇於畫宗黃大癡然亦極意倣摹不輕落筆

何三畏漱
六齋全集

是龍小楷精工過於婉媚行草豪逸有態

書史
會要

莫雲卿筆塵行書雲卿與劉生手簡莫廷韓詩

詞墨蹟碧山樵臨帖論文合卷莫廷韓真行合卷

式古堂書
畫索攷

莫雲卿書筆麈

廷韓作散語有蘇黃之致書法米顛亦咄咄逼人此
數則乃得之不經意草草者而天真朗然中載天上
立世宗勅尤為奇話晴窓一展為之拍拍竹懶李日

華識

恬致
堂集

陳澐

陳澐字子兼號雨泉吳縣人嘉靖戊戌進士除工部
營繕主事累官至四川右布政使詩文冲遠有致書

法尤精絕牋疏榜署得者以為榮

申時行賜
問堂集

陳璠工小楷出入鍾歐自行草劈窠以逮榜署書尤

豐媚適逸有天然趣

奔州
續集

雨泉於書法為最工小楷篆隸出入晉唐其他行草

及方尺以上豐媚綽約有驚鴻游鵲之態

茅坤鹿
門集

雨泉善行草尤工榜署書

姑蘇名
賢小紀

陳爾見

陳爾見璠子亦能書

申文定
公橐

吳維嶽

吳維嶽字峻伯

號容
寰

孝豐人嘉靖戊戌進士以僉都

御史巡撫貴州

湖州
府志

維嶽正行取豐媚而少邁勁

書史
會要

馮惟重

馮惟重字汝威號芹泉廣寧人嘉靖戊戌進士授行

人工詩善書

余繼登澹
然軒集

陸師道

陸師道字子傳號五湖長洲人嘉靖戊戌成進士拜
都水主事改儀部入直內閣以母老乞歸起為尚寶
少卿師事待詔刻意為文章及書畫皆入能品

姑蘇名賢

小記

師道工小楷及古隸

馮元成集

陸子傳全得麻姑壇法而以色澤傳之遂為一時書

家冠

王世貞三吳楷法跋

陸子傳詩牋行書

武古堂書畫彙攷

陸安道

陸安道師道弟也亦善書

夔州續彙

王穀祥

王穀祥字祿之長洲人嘉靖己丑進士改庶吉士授工部主事轉吏部文選員外郎乞歸家居二十年隆慶初起南吏部辭不受美姿容善書畫詞致清雅鈔錄古文籍至數百千卷咸精好令人不忍觸手人以書畫求者不輒應一室之內琳琅金薤謚如也

馮元成集

穀祥書倣晉人不墜右軍大令之風篆籀八體並臻

妙品

皇甫訪
司勳集

王酉室詩草

式古堂書
畫彙考

許初

許初字復初一字元復以縣學生序貢授教職書法

師二王尤工篆籀譽重公卿間擢南太僕寺主簿遷

漢陽通判

吳縣志

許初工小篆莊整而秀兼善楷草

詹氏
小辨

初頗自高伉不屑下人有文學工大書不輕與人書

萬姓
統譜

許元復去歲札行草書

式古堂書
畫彙攷

吳達

吳達字近光號雲泉新淦人嘉靖己丑進士授兵部主事終四川按察副使長於歌詞草書

羅念菴集

陸樹聲

陸樹聲字與吉號平泉華亭人嘉靖己丑進士選庶

吉士授編修隆慶中為禮部尚書稱病乞歸

馮元成集

樹聲曰余晚年知慕八法然衰老指腕多強復懶放

不能抑首臨池每屈意摹倣拙態故在

清暑筆談

陸平泉龍潭閣札行書 陸尚書海棠花帖行書

式古

堂書畫

彙考

邢一鳳

邢一鳳字羽伯一字雉山嘉靖辛丑進士第三人為

翰林編修累官太常少卿左遷參政罷歸小篆師徐

子仁

周詩江寧縣志

張寰

張寰字允清崑山人登嘉靖辛丑進士知濟寧州陞
刑部員外郎至通政司右參議致仕歸惟以圖史自
娛臨摹法書揮翰竟日不倦

震川集

皇甫濂

皇甫濂字子約嘉靖甲辰進士除工部主事謫河南
布政理問遷興化同知投劾不赴家居好養生家言
省撰述惟詩不廢間臨晉唐人帖皆臻佳妙

蘇州府志

朱曰藩

朱曰藩字子价寶應人舉嘉靖甲辰進士為烏程令
終九江知府常閉戶讀書素工筆札門外持練素求

詞翰者纚纚不絕

歐大任
崙山集

九江頗臨晉法書絕喜祝希哲而以己意出之婉秀

瀟灑絕有姿態而結法失之疎

書史
會要

羅汝芳

羅汝芳字惟德南城人學者稱為近溪先生登嘉靖

甲辰進士仕至雲南大參小楷有鍾元常筆法

書史
會要

周思兼

周思兼字叔夜號萊峰華亭人嘉靖丁未進士授平度知州超拜廣西提學副使私謚貞靖先生善行草

松江志

周紹元

周紹元字希安思兼子隱居藻里工八分精篆刻

松江

志

周裕度

周裕度字公遠紹元子工楷篆

松江志

張天復

張天復字復亨山陰人登嘉靖二十六年進士仕至

行太僕卿博學工文亦善書

紹興志

馬一龍

馬一龍字員圖號孟河溧陽人嘉靖丁未進士為南

京國子司業

列卿紀

一龍用筆本流迅而乏字源濃淡大小錯綜不可識

折者亦不成章

書史
會要

一龍法素師聖母文頗得筆法

唐氏
小辨

一龍作字懸腕運肘落管如飛頃刻滿幅自謂懷素以後一人然評者謂其奇怪為書法一大變

羅鹿齡

羅鹿齡書師馬一龍稍變為圓美而多作俗筆

書史
會要

馬汝僕

馬汝僕字誠望號鷺江江寧人嘉靖壬子領鄉薦任

慶元令書法逼右軍

江寧府志

誠望刻意聖教序幼年者佳

金陵瑣事

周思久

周思久字柳塘麻城人嘉靖癸丑進士任瓊州守抗志希古品諸卓犖其治行見稱於海剛峰工詩善書

法

湖廣通志

王可大

王可大字元簡嘉靖癸丑進士初授刑曹出補瓊州

轉台州知府書法趙松雪大數寸者尤佳

江寧府志

胡汝嘉

胡汝嘉字懋禮號秋宇嘉靖癸丑進士官編修隸書

師鍾元常草書師張伯英崔子玉嘗取三人書之在

閣帖者從宋榻本手摹刻之

江寧府志

秋宇得意之筆酷似枝指生

金陵瑣事

胡懋禮書為金陵名品行草出二王父子隸書規模

元常大令古雅中天趣溢發

澹園集

魏學曾

魏學曾字惟貫號確菴涇陽人嘉靖癸丑進士授戶部主事歷兵部尚書文宗司馬子長書宗晉俱得其

逸趣

分省人物考

晁東吳

晁東吳字叔泰開州人嘉靖癸丑進士改庶吉士善搨古書法每自心得偶臨作趙松雪書散置卷中見

者莫能辨

大名府志

郭斗

郭斗字應秀嘉靖癸丑進士歷浙江左轄致政歸賦詩作書構小樓於進耳山扁舟往來會心自適者十

餘年

雲南通志

姚汝循

姚汝循字敘卿江寧人嘉靖丙辰進士知杞縣擢南

刑部主事出守大名

江寧府志

汝循善真行書

續說

張橋

張橋字衡如雲南府人嘉靖己未進士授水部主政擢寧夏兵備僉事罷歸精心墳典自六經子史旁及真銓釋典稗官小說靡不研究尤精書法至今得其

隻字爭寶之

雲南通志

戚元佐

戚元佐字希仲號中岳秀水人嘉靖壬戌進士仕至

尚寶卿長於詩文又善書畫

嘉興府志

戚中岳精楷法與文徵仲頡頏

六研齋筆記

沈玄華

沈玄華字邃伯嘉興人嘉靖壬戌進士杜門著述善
飲左持觴右執卷伊吾至丙夜字法趙松雪仕至南

京大理卿

秀水志

張嶺

張嶺字子謙世家盱城南金斗窠別號斗陽工古文

詞及真草書嘉靖戊辰成進士為蘇州府通判

鄧元錫潛

學

章公美

章公美字道華吳人嘉靖進士官四川憲副書倣祝

京兆

書史
會要

徐文溥

徐文溥初名鳳更名溥字可大自號岳峰又號夢漁

數歲善草書後成進士嘉靖時官廣東憲副

書史
會要

連鑛

連鑛字伯金號白石更號明山永年人文追先秦詩

步盛唐字法端勁如其為人嘉靖丙戌進士選庶吉

士仕至都察院右副都御史

分省人物考

華鑰

華鑰字德啓別號水西無錫人嘉靖癸未進士授戶

部主事終職方郎中嘗筮易得賁白之明夷更號白

賁子博學明諸經文章精健古詩似魏晉律似杜書

法似虞柳

鄭端簡公集

左國璣

左國璣字舜齊大梁人嘉靖中舉於鄉性嗜酒作詩賦古文出語輒驚人字畫邁勁奇古

分省人物考

梁懷仁

梁懷仁字宅之晉江人生而慧絕週歲識字三歲誦書四歲善草書吟詩子史經傳無不能讀十六貢禮

部二十登嘉靖己丑進士奉命賜歸娶授南吏部驗

封主事居三月死年二十三

閩書

蔡一槐

蔡一槐字景明晉江人嘉靖己未進士除戶部郎出
為湖廣僉事遷廣東參議善小楷行草

閩書

王問臣

王問臣字正叔號郊川嘉靖間進士累官吏部文選

員外郎書善行篆


長洲志

張景賢

張景賢眉州人世廟時為右僉都御史博古好奇詩

文書法俱妙絕一世

四川總志



六藝之一錄卷三百六十九